

BYWNANS KI

Harth! Harth! Muskoges! Nyns eus edhomm dhis a'm potya! Nyns yw ow fowt ty dhe vos an hagera benyn y'n dre.

“Ke dhe ves ha gorta dhe ves! Mara'th welav omma arta, my a wra dha ladha!”

Rrr! My a yn lowen, venyn flerek. Peub a woer bos dha vakken gwrys a rathes ha ny vynnav gortos omma mynysenn moy gans skrijow mogh oll an termyn a-dhiworth dha weythva. Yn hwir, yth av, yth av....(mes my a wra dehweles diwettha ha martesen ty a wra ow ankevi po y fydh nebonan kuffa yn dha le.)

Mes dydhyow ny dhybris vy travyth ha res yw dhymm kavoes neb boes lemmyn yn skon.

Treweythow nosweyth yma tammow salsigenn yn atal kistyow a-dryv an sinema mes y'n eur ma an gwella le a vydh an kigtow yn Stret Veur. Yn kynsa le Pooleys a-rag an sinema.

Nyns yw pell a-dhiworth an gweythva bakken bys dhe'n Stret Veur a-hys skochfordh ynn. Yma skantlowr spas dhe bassya der an hyns bys dhe Stret Veur mes otta! Mir orth henna! An tekka le yn oll an bys. Ha hedhyw gans an daras igor – klew an bewin na! Ogh – yma ow ganow ow towra! Ny allav y berthi namoy.

Mes skoel a'm termyn via assaya entra y'n gwerthji – henn yw kler. Yth hevelons jolif mes an vreder na yw moldroryon. Yns! Unnweyth ow howeth a slynnyas a-ji dhe'n gwerthji hag a-dhistowgh i a'n merkyas ha tewlel kollel orto. An gollel giger a'n pychyas yn garr. Ev a skappyas a'n gwerthji skaffa gallo ow kelli meur a woes erna gavas le kudhys ynter atal kistyow hag yn lent merwel ena y honan.

Fell yw an gigoryon ma mes kuv lowr yw aga frenoryon treweythow. Dhe lentta an venyn, dhe guffa hy holonn.

Rag ensampel, an venyn na, tew hy diwarr, ow tiberthi an kigti lemmyn a vydh da lowr martesen. An saghow na yn hy dewdhorn a hevel poesek hag yma avi oen dell grysav y'n sagh a gledhbarth. Hi a dhalleth yskynna Stret Veur yn skon mes tamm ha tamm yma hy hammow ow tos ha bos lentta ha lentta ha'n saghow a dhropp isella hag isella bys pan hedh hi wos'tiwedh ha gorra hy saghow war an dor.

Hemm yw ow chons. Ny allav gul kamm!

Ow ganow a dhever bys mayth yw ow elgeth fest glyb, ow yeuni war-lergh an prys poran pan allav blasa an kig sugnek.

My a slynk yn lent, yn kosel, ow thorr ow kryghlemmel. Nessa ha nessa – oll an termyn ow mires orth enep an venyn.

Ena – ow frys! Hi a dhrehav hy fenn rag mires orth klokk hel an dre a-ughti ha my a dhalgenn an kig ha...

Darr! Jowl! Pandr'a hwer dhymm?

Ow nija der an ayr, payn euthek yn ow thenewen, my a as skrij yn mes a'm enev. My a dir war an dor ha mynnes growedha ena bys vykken yn payn ha nown mes my a yll gweles an den garow neb a'm potyas ow nesa gans an venyn dew.

A, venyn dew, venyn dew! Dhe'th kregi! My a wel dha vos parys rag an gwav hag yma edhomm brassa dhymm a'n avi na. Mir orth ow eskern! Mir! Ro dhymm an avi – sur ov ty dhe dhybri moy ages lowr pub dydh, tebelvenyn. Ha ty, den drog, my a wra dynsel dha arr mar teudh jy nessa! Rrrr.

My a assay grysla ha deskerni orto mes kler yw ow bos fethys omma ha ny vynnav perthi pott arall.

My a slynk dhe-ves owth oulya dhymm ow honan gans lost ynter ow diwarr. Nownek ow thorr, bryw ow thenewen, my a vov yn lent. My a gerdh dhe'n varghas le may ma klokk hel an dre rybdhi. Leun a dus yw homma awos y vos dydh marghas. An diogyon ha'ga heun a vir orthiv gogrysek ha'n bughes ow tos ha bos anes y'm kyrghynn. I a woer ow bos anfeusik ha klav ha ny vynnons i bos klevesys. My a woer. Pupprys an keth yw. Ny vern. Nyns eus travyth omma ragov – nyns yw an marghasla marnas skochfordh ragov dhe'n koffiji "Oen ha Baner".

Gwragedh an diogyon a omvet ena wosa prenassa rag eva te, gortos aga gwer ha kyns oll klappya. Treweythow my a gyv benyn yowynk ena ha mires yn hy dewlagas gans ow golok drist. Rag hemma an re skentel a re dhymm tamm a vakken po neppyth, mes nyns eus lies den skentel y'n dre ma.

My a yskynn an grisow a wrowan dhe'n koffiji hag omglewes parys dhe verwel. My a nes daras an koffiji ha holya an blasow a de, tus ha boes a-bervedh.

Kellys y'n blasow marthys, ny wrug vy merkya tiek koth ow tos gans lorgh. Ny welis vy an lorgh na mes my a'n klew!

Ogh! Harow! Payn euthyk – yn ow thenewenn arall lemmyn!

My a yll klewes lev kales an tiek ow karma mes my a boen dhe ves dhe Vownder Glas. Kosella yw ena hag yma edhomm dhymm a bowes. Leun a bayn ha nown, my a gyv aswa yn ke ha growedha ena. Yn gwiryonedh my a vynn merwel po dhe'n lyha koska hag ankevi. Fatell allav vy lettya an payn? Martesen mar assayav koska pols.

My a yll klewes tus ha kerri ow tremena hag ena my a hunros a dus ha kerri ow tremena. Nyns ov vy sur pyth yw gwirvos namoy. Wosa termyn hir, my a dhalleth hunrosa blas bewin ynwedh! Ogh blas bewin. Mes hunros fell yw. Yma den kuv ow kewsell orthiv y'n hunros – ny hwer henna yn bywnans gwir. Mes my a omglew moy ha moy difun. A allsa bos an blas na gwir? Ny vynnav vy igeri ow lagas ha dehweles dhe'm bywnans gwir....mes res yw dhymm godhvos mars yw an bewin na gwir. Onan, dew, tri...

Jowl. Yma tamm bewin ena yn tevri. Ryb ow ganow! Hag yma den pur yn ogas ow mires orthiv. Ny hevel ev peryllus ha my a assay drehedhes an bewin gans ow thaves.

A-barth Duw. Nevek yw henna. My a dheber an tamm a vewin ha mires orth an den. Ny wrug ev ow frappya. Koynnta hwath, ev a worr tamm moy a vewin a-dherag dhymm.

"Ottajy, ow flourenn! Pyth yw dha hanow?"

Kuv lowr yw an den ma, mes fest gokki. Hanow ragov? Piw a rosa dhymm hanow? Nyns esa den vyth yn ow bywnans a rosa dhymm vyth oll. Heb perghenn ov ha rydh avel an gwyns soweth.

Ev a das ow hota hag ena drehevel onan a'm garrow. Den divlas! Gwra mellya orth dha daklow dha honan!

"A, sirra! Gour os. Ytho, yw Rex dha hanow? Rex? Yw? Yw. Dydh da, Rex, ow maw."

Reks? Os ta gokki? Reks! Pyth yw styr a henna? Nyns yw henna ow hanow, mester. Mes sirra – henn yw da lowr. Hag "ow maw"!

"Kemmer tamm moy a vewin, Rex. Maw da."

Wel, mar derydh. Eus moy?

"Gorta pols, Rex. Yma moy yn ow focket. Ottajy."

Meurastahwi. Pur vlasus yw. Ny wrug vy dybri kig a'n par ma yn oll ow bywnans.

"A vynn'ta kavoes tamm moy, Rex?"

Heb wow!

Mes lemmy'n, an den jentyl a worr an nessa tamm a gig war an leur a-dheragov. Ny allav ystynn ow honna lowr dhe dhrehedhes an tamm ma. Res yw gul devnydh a oll ow krevder dhe sevel ha trebuchya war-rag. Ogh arta an blas na! Yw henna yn hwir Rysrudh hwath po esov vy lemmy'n yn nev?

"Yn sol! Pur dha. A vynn'ta dos tre genev? Yma moy a gig ena ha le salow ragos."

Ny allav y grysi. Py par maglenn yw homma?

"Deus Rex ow maw. Tann tamm moy a gig. Ass os ta ki teg! Nyns yw ow thre pell a-hys an stret ma. My a yll gweles bos dha vywnans kales. My a vynn dha weres. Ott tamm moy."

Ogh marthus da yw dha gig. Ha blas dha dhewdhorn a hevel da lowr yn ow throen. My a grys dha vos den da. Ytho gwren ni mos dhe'th chi leun a gig. My a wra dha sywya.

Ev a dhalleth kerdhes yn lent a-hys an stret owth hedhi treweythyow dhe dhiskwedhes dhymm tamm byghan a gig. My a syw nebes kammow a-dhelergh dhodho. Mes my a nes dhodho pan dhiskwedh ev an kig. Rewgh dhymm an tamm na! Prag na rowgh an kig dhymm lemmy'n?

"Ogas tre eson ni! Ottomma – an chi na. A nyns yw teg, Rex? Deus omma, maw, deus omma."

Wel, teg lowr yw ragov vy. Eus keun erell omma? Gwynnvys ny allav klewes ki vyth omma y'n lowarth. An den a iger daras an chi.

"Lucy! Deus omma! Mir orth an pyth a wrug vy kavoes yn Bownder Las! Dro tamm a'n gesigow kig yar yn skon! Bydh kosel, Rex. Lucy yw agan kowethes ha hi a dhre dhis kig yar. A nyns yw hi kuv? Yw. Kuv yw hi. Deus omma Rex."

"Oliver. Otta an gesigow. Hag an ki plos na - yw henna oll? Ny welis vy ki mar glav ha hager kyns."

Mir orth piw a gews! Gans troen a'n braster na, marthys yw ty dhe alloes ow gweles yn kynsa le!

"Taw taves, Lucy! Bydh kuv dhodho."

Ya. Taw taves gast.

"Ottajy Rex. An kig yar ma yw ragos! Saw ragos. Deus a-ji. Bydh ki da. Deus a-ji."

Nyns ov vy sur a-dro dhe'n venyn hager na ha – hff hff – yma neb fler koynt yn kyrghynn an daras. Yw an chi ma salow yn hwir, sirra?

"Deus a-ji, Rex".

Yth hevel hwi dhe vos den jentyl ha termyn hir ny dhybris kig yar. Da lowr. Bedhewgh kuv dhymm. Barth Dyw! An kig yar ma yw marthys da!

"Maw da, maw da. My a wra degea an daras dhe vos salow a-ji. Ass os ta ki teg, Rex."

Wel, nebnonan a leveris bos ow thas Labrador ha rakhenna yma troen splann dhymm mes nyns ov vy sur.

"Teg lowr vydh y benn martesen. Y gorf yw gisys ha kroenek."

Meur ras bras, gast. Gwith dha droen yn-mes.

"My a woer mes nyns eus perghann dhodho dell grysav. Henn yw an poesekka tra. Y benn a vydh perfeyth."

Bydh? Perfeyth yw ow fenn seulabrys. Hag ow horf a wra gwellhe gans moy a gig yar.

"Lucy. Dri an kloroform. Nyns eus termyn dhe skoellya. Ki da, Rex, maw da. O an kig yar da?"

O. Mes y talvia dhymm diberthi lemmyn. Yma ayrgylgh koynt y'n chi ma ha gwell yw genev mos. Ny wrug vy merkya kyns oll an enyvales omma yn kistyow a weder. . Ny welis vy enyvales a'n par ma kyns omma yn Rysrudh. Y'n gornell na a-dryv dhis, yw henna kath gans penn goelann? Hag ena rath gans penn kwilkyn? Hag an enep na? My a'n aswonn dell ov sur. Mes yma korf hogh dhodho ha ny aswonn vy hogh vyth oll.

Martesen re sempel ov rag tus jentyl mes hemm yw re ragov vy. Ny gonvedhav mann hag yma omglewans koynt dhymm omma.

Meur ras a'n kig yar mes res yw dhymm mos. Igor an daras mar pleg. Sirra.

"Bydh da. Deus omma, maw da. Lucy – ro dhymm an kloroform yn skon!"

"Parys yw. Otta."

My a vynnasa fydhya dhywgh sirra hag omlowenhe der agas kuvder. Kynth yw hemma an kynsa prys y'm bywnans nebonan dhe'm barlenna ha byrla, termyn yw dhe vos yn tevri. My a vynn mos. Lemmyn, mar pleg dhywgh! Ha nyns yw da genev an gweith wynn na – kemmer honna dhe ves ynwedh mar pleg!

“Ki da, ki da. Na borth own. An gweth ma a wra ri dhis hunrosow hweg. Anell yn town, Rex. Ki da. Anell yn town.

Gas vy dhe vos mar pleg. Gas vy. Mar pleg? Gas... gas...benyn euthyk... gas...

Ogh.

Ple...pleth esov vy?

Konines?

Kansow anedha! A-barth Duw – gwynn ow bys! Py konin a wrav vy dhe dhybri kynsa? Ty! Harth!